

## **A totes los que vòlon far viure la lenga occitana**

Amb las doas manifestacions de Carcassona e de Besièrs, « Anem Òc » a mostrat que de milièrs de personas se podían mobilizar, dins l'unitat, a l'entorn de qualques reivindicacions simples per far viure la lenga.

Dempuèi aquelas mobilizacions de causas càmbian. Mai de collectivitats se meton a far quicòm per la lenga. D'unas an quitament mesas en plaça de programas de desvolopament

Pasmens çò que caup dins la Crida « Anem Òc ! per la lenga occitana ! » es pas encara realitat. Devèm encara e totjorn contunhar la pression, particularament de cap a l'Estat qu'a pas bolegat duscas ara.

**« Anem Òc ! » a decidit de tornar lançar la mobilizacion per manifestar a la fin de 2009 en gardant las cinc reivindicacions de basa contengudas dins la crida.**

Manifestar amassa per se retrobar e dire publicament çò que demandam es plan, mas sufís pas. Nos cal preparar coma cal la mobilizacion de 2009 e soscar als mejans de melhor far passar, tre ara, lo messatge nòstre dins la societat, a totes los nivèls : associacions, monde economic, monde politic.

De mai lo govèrn a promés una iniciativa e eventualament un debat parlamentari sus la question de las lengas. Devèm far çò que cal per que la promessa siá tenguda e per preparar aquel debat.

Nos cal mai que jamai definir nòstras ambicions per la lenga occitana. Mai que jamai devèm far passar lo messatge que la lenga es l'afar de totes, de l'ensemble de la societat. Cal que pertot siá pausada la question de la lenga coma un element constitutiu del desvolopament que volèm per nòstre país.

**Per aquò far, « Anem Òc ! » convida totes los que vòlon far viure nòstra lenga a un grand debat que se farà lo 27 d'abril a Besièrs.**

Aquel debat serà a l'encòp una reflexion sul biais de portar las reinvidicacions nòstras e tanben sul biais d'organizar la mobilizacion per que la manifestacion de 2009 siá una granda capitada .

Cadun sentís qu'avançam, mas cadun sap que res es pas ganhat. I a encara un fum de monde que nos cal anar veire, d'arguments que cal tornar dire, de proposicions que cal cambiar en accions. La simpatia que creís en favor de nòstra lenga, la cal cambiar en projèctes concrets, en politics publicas.

La fòrça de proposicion del monde associatiu unit e l'investment de cadun an començat de far bolegar las causas . Es aquela fòrça que nos menarà sul camin de la reconeissença dels dreits que volèm per la lenga occitana.

### **La coordinacion « Anem Òc »**

( Institut d'Estudis Occitans, Felibrige, Federacion dels Ensenhaires de Lengas e Cultura d'Òc, Calandreta, Òc-Bi, Conselh de la Joventut d'Òc)

*Pj: - programa dau 27 d'abriu*

*Entres-senhas: 04 42 59 43 96- [comitat.anem-oc@club-internet.fr](mailto:comitat.anem-oc@club-internet.fr)*